



# SIUMUT INATSISARTUNI ILAASORTAATITAT / LANDSTINGSGRUPPEN

Nuuk, 14. 12.09

Inatsisartut suleriaasiat § 36 immikkoortoq 1 naapertorlugu Naalakkersuisunut imaattumik apeqquteqarniarpunga.

1. **Paarisap pinaveersaartitsinermik suliniutigisartagai innuttaasunit qanoq soqutigineqartiginersut imaluunniit iluaqutaatiginersut paasiniarlugit misissuisoqarnikuunerluni?**
2. **Paarisa-mut aningaasaliisutigineqartartunut pinaveersaartitsinermut sunniutaasartut naleqqunnerlutik imaluunniit aningaasaliissutaasartut suli amerlanerusariaqarnerlutik?**
3. **Inuunerittami suleqatigiissitap inuttalersugaanera eqqarsaatigalugu ilumut inuttaritinneqartut tamakkerlutik suleqatigiissitamut tulluartsuuppat?**

(Inatsiasrtuni ilaasorta, Malik Berthelsen Siumut)

## **Tunngavilersuut:**

Qularinngilara Paarisami sulisut piumassuseqarluarlutik pinaveersaartitsinermik annertuunik suliniuteqartut aamma nittartagaat misissorlugu takuneqarsinnaavoq qulequttanik arlalissuarnik pinaveersaartitsinernik suliniuteqartartut.

Taamaakkaluortoq pinaveersaartitsinermi periuseq ullumikkutut ittoq innuttaasunit qanoq soqutigineqartiginersoq qanorlu iluaqutaatiginersoq paasissallugu soqutiginarlippara.

Inuunerittammi 2007-miit 2012-mut suliniarfissaani arfineq marluusuni ullumimut kukkunngikkuma marluk, tassa imigassamik tupanillu atuineq maannamut taamaallaat iluatsissimasutut oqaatigisariaqarput.

Oqaatigisariaqarpormi persuttaasernerit, naartuersinnerit, kinguaassiutitigut nappaatit tunillaattartut gonore chlamydia, timimillu aalatitinnngippallaarnerup kinguneranik

pualavallaalernerit sukcornerillu ikiliartoratik taamaaruusaaginnarsimangikkunik amerliartorsimasut, naak ikilisikkiartorneqarnissaat anguniagaagaluartoq.

Inuup nammineq peqqissuunissani akisussaaffigaluaraa, pinaveersaartitsineq ullumikkutut isikkoqartillugu ilumut iluaqutaasimangippat aperisariqalerpugut sunaana pinaveersaartitsinermit pitsangorsartariaqaripput imaluunniit sunaana amigaatigigipput?

Isumaga malillugu kinguaassiuutinut atoqatigiinnermullu tunngasunut paasititsiniaasernerit pikkunaappallaarput kingunilimmillu eqqarsalersitsissanatik.

Assersuutigiinnarlugit TV-mi inuusuttut aappariit puisit amiinik qarllilerlutik takutinneqartartut issuaaffigilaassavakka, ”Pilersaaruserluareerlutinngooq qitornartaarput, soorunamigooq usuup puua atorlugu”. Tamatta nalunngilarput usuup puua atorlugu naartulertoqarsinnaanngitsoq, taamaattumik ilumoornerusunik eqqarsalersitsisinnaasunik paasititsiniaanerit ingerlanneqartariaqartut isumaqarpunga.

Inuunerittami suleqatigiissitap inuttalersugaanera takugakku nassuerutigisariaqarpara inuttalersugaanera pikkunaatsoorfigigakku.

Innuttaasut peqqinnerulernissaanut suliaq iluatsilluassappat isumaqaraluarama nunatsinni timersornermik aallatutalinnik ilisimasalinnilluunniit ilaqaraluarunik pitsaanerussagaluartoq. Tamakkuuppummi allaffissuarni pisortaninngaanniit timip aalatinnissaanik ilisimasaqarnerullutillu ulluinnarni timersornermik aallutaqarnerusuusut.

Inuunerittap suliniutaasa naammassinissaanut ukiut marluinnangormata neriuppunga arlaatigut suliniutinik eqeersaasoqartariaqartoq nutaanillu eqqarsarsortaqaqartariaqalersoq.